

御選語錄卷第三十七

即七

歷代禪師語錄後集

報慈藏與禪師

僧問情生智隔想變體殊祇如情未生時如

何師曰隔曰情未生時隔箇甚麼師曰這箇

梢郎子未遇人在

雲門文偃禪師

師在雪峰僧問峰如何是觸目不會道運足

焉知路峰云蒼天蒼天僧不會遂問師蒼天

意旨如何師云三斤麻一疋布僧云不會師

云更奉三尺竹峰聞喜云我常疑箇布衲

師在浙中蘊和尚會裏一日因喫茶次舉蘊

和尚垂語云見聞覺知是法法離見聞覺知

作麼生有旁僧云見定如今目前一切見聞

覺知是法法亦不可得師拍手一下蘊乃舉

頭師云猶欠一著在蘊云我到這裏却不會

師到臥龍問明已底人還見有已麼龍曰不

見有已始明得已又問長連牀上學得底是

第幾機龍曰是第二機曰如何是第一機龍

曰緊峭草鞋

到天童童曰你還定當得麼師曰和尚道甚

麼童曰不會則目前包裹師曰會則目前包

裹

到鵝湖聞上堂曰莫道未了底人長時浮逼

逼地設使了得底明明得知有去處尚乃浮

逼逼地師下問首座適來和尚意作麼生曰

浮逼逼地師曰首座久在此住頭白齒黃作

這箇語話曰上座又作麼生師曰要道即得

見即便見若不見莫亂道曰祇如道浮逼逼

地又作麼生師曰頭上著枷脚下著杻曰與

麼則無佛法也師曰此是文殊普賢大人境界

問新到你諸方行脚道我知有與我拈三千大千世界來眼睫上著僧云喏師云錢塘爲甚麼去國三千里僧云豈干他事師云者掠虛漢

問首座乾坤大地與你自己是同是別曰同師曰一切物命蛾蚋蟻子是同是別曰同師曰你爲什麼干戈相待

舉座主就華嚴講請翠巖齋巖云山僧有箇問座主若道得即齋巖便拈起胡餅云還具法身麼主云具法身巖云與麼則喫法身也主無語本講座主代云有什麼過巖不肯東使云喏喏師代云特謝和尚降重空筵問樹凋葉落時如何師云體露金風

即七

二

有講僧叅經時乃曰未到雲門時恰似初生月及乎到後曲彎彎地師得知乃問是你道否曰是師曰甚好吾問汝作麼生是初生月僧乃斫額作望月勢師曰你如此已後失却目在僧經旬日復來師又問你還會也未曰未會師曰你問我僧便問如何是初生月師曰曲彎彎地僧罔措後果然失目

問一生積惡不知善一生積善不知惡此意如何師曰燭

問承古有言了即業障本來空未了應須償宿債未審二祖是了不了師曰確

即七

三

問新到甚處人曰新羅師曰將甚麼過海曰草賊大敗師引手曰爲甚麼在我這裏曰恰是師曰一任跨跳僧無對

問十二時中如何得不空過師曰向甚麼處

著此一問曰學人不會請師舉師曰將筆硯來僧乃取筆硯來師作一頌曰舉不顧即差互擬思量何劫悟

問一口吞盡時如何曰我在你肚裏曰和尚爲甚麼在學人肚裏師曰還我話頭來

師問嶺中順維那古人豎起拂子放下拂子意旨如何順曰拂前見拂後見師曰如是如是師後舉問僧你道當初諾伊不諾伊僧無對師曰可知禮也

問直歲甚麼處去來曰刈茆來師曰刈得幾箇祖師曰三百箇師曰朝打三千暮打八百東家杓柄長西家杓柄短又作麼生歲無語師便打

問僧甚麼處來曰西禪師曰西禪有何言句僧展兩手師與一掌曰某甲話在師却展兩手

僧無語師又打

問僧甚麼處來曰禮塔來師曰謔我曰某甲實禮塔來師曰五戒也不持

問僧看什麼經僧云瑜伽論師云義墮也僧云甚麼處義墮師云自領出去

問僧看甚麼經其僧却指旁僧云和尚問何不祇對師云露柱爲甚麼倒退三千里僧云豈干他事師曰學語之流代云泊合不識勢師見飯頭云汝是飯頭麼云是師云顆裏有幾米米裏有幾顆頭無對代云某甲瞻星望月

王太傅問北院古人道普現色身徧行三昧佛法爲甚麼不到北俱盧州院云祇爲徧行所以不到師云如法置一問來師坐次有僧非時上來師云作甚麼僧云請

益師云你有甚麼疑僧云某甲曾問和尚一宿覺搬柴搬一宿覺師乃敲椅子三下云你作麼生會僧云一切臨時師乃搥拳云我與你相撲一交得麼僧無對次日僧再上值師漱盥次師乃將水碗過與僧云送去厨下著其僧送去了却來師見來乃從後門出去其僧云比來請益祇得一口碗

因供養羅漢問僧今夜供養羅漢你道羅漢還來也無僧無對師曰你問我僧便問師曰換水添香僧曰與麼即來也師云有什麼慢頭龜子速下來

一日行次一僧隨後行師竖起拳云如許大栗子契得幾箇僧云和尚莫錯師云是你錯僧云莫壓良爲賤師云靜處薩婆訶

問如何是一代時教師曰對一說

即七

五

問不是目前機亦非目前事時如何師曰倒一說

師云古佛與露柱相交是第幾機僧問意旨如何師云一條條三十文買復代前語云南山起雲北山下雨僧又問一條條三十文買如何師云打與

師赴廣主召至府留止供養兩月餘還山謂衆曰我離山得六十七日且問汝六十七日事作麼生衆莫能對師曰何不道和尚京中喫麵多

示衆古德道藥病相治盡大地是藥那箇是你自己乃曰遇賤即貴僧曰乞師指示師拍手一下拈拄杖曰接取拄杖僧接得拗作兩橛師曰直饒恁麼也好與三十棒

示衆從上祖師三世諸佛說法山河大地草

木爲甚麼不省去代云新到行人事
示衆拄杖子化爲龍吞却乾坤了也山河大
地甚處得來

師每顧見僧即曰鑒僧欲酬之則曰唵率以
爲常故門弟子錄曰顧鑒唵德山密禪師剛
去顧字但以鑒唵二字爲頌謂之抽顧頌

芭蕉繼徹禪師

師初叅風穴穴問如何是正法眼師曰泥彈
子穴異之次謁先芭蕉蕉上堂舉仰山道兩
口一無舌此是吾宗旨師領悟禮拜

承天院辭確禪師

僧問衆罪如霜露慧日能消除時如何師曰
亭臺深夜雨樓閣靜時鐘曰爲甚麼因緣會
遇時果報還自受師曰管筆能書片舌解語

風穴延沼禪師

師叅南院入門不禮拜院曰入門須辨主師
曰端的請師分院於左膝拍一拍師便喝院
於右膝拍一拍師又喝院曰左邊一拍且置
右邊一拍作麼生師曰瞎院便拈棒師曰莫
盲枷瞎棒奪打和尚莫言不道院擲下棒曰
今日被黃面浙子鈍置一場師曰和尚大似
持鉢不得詐道不饑院曰闍黎曾到此間麼
師曰是何言歟院曰老僧好好相借問師曰
也不得放過便下叅衆了却上堂頭禮謝院
曰闍黎曾見甚麼人來師曰在襄州華嚴與
廓侍者同夏院曰親見作家來院問南方一
棒作麼商量師曰作奇特商量師却問和尚
此間一棒作麼商量院拈拄杖曰棒下無生
忍臨機不見師師於言下大徹立旨遂依止
六年

一日南院問曰汝聞臨濟將終時語否曰聞之曰臨濟曰誰知吾正法眼藏向這瞎驢邊滅却渠平生如師子見即殺人及其將死何故屈膝妥尾如此對曰密付將終全主即密又問三聖如何亦無語乎對曰親承入室之真子不同門外之遊人南院頷之

上堂祖師心印狀似鐵牛之機去即印住住即印破祇如不去不住印即是不印即是還有人道得麼時有盧陂長老出問學人有鐵牛之機請師不搭印師曰慣釣鯨鯢澄巨浸却憐蛙步驟泥沙陂注思師喝曰長老何不進語陂擬議師便打一拂子曰還記得話頭麼陂擬開口師又打一拂子時有牧主曰信知佛法與王法一般師曰見甚麼道理主曰當斷不斷反招其亂師便下座

問隨緣不變者忽遇知音時如何師曰披蓑側立千峰外引水澆蔬五老前

問九夏賞勞請師言薦師曰出袖拂開龍洞雨泛杯波涌鉢囊花

問如何是清淨法身師曰金沙灘頭馬郎婦問如何是佛師曰杖林山下竹筋鞭

黃龍誨機超慧禪師

僧問急切相投請師通信師曰火燒裙帶香僧問風恬浪靜時如何師曰百尺竿頭五兩垂

僧問毛吞巨海芥納須彌未是學人本分事如何是學人本分事師曰封了合盤市裏揭

明招德謙禪師

清上座舉仰山插锹話問師古人意在叉手處插锹處師召清清應諾師曰還夢見仰山

麼清曰不要上座下語祇要商量師曰若要
商量堂頭自有一千五百人老師在

師在疾一日國泰深和尚來問疾侍者通報
云深師叔來師令請深纔入方丈師便云阿
哪阿哪深師叔救取老僧深云和尚有什麼
救處師舉頭一覷云咦眼子烏嚕嚕地依前
是舊時深上座乃回身面壁

師問國泰瑫和尚云古人道俱胝祇念三行
咒便得名超一切人作麼生與他拈却三行
咒便得名超一切人國泰豎起一指師云不
因今日爭識得瓜州客

師會迅菴主在高司徒宅見挂彌勒幃子師
指彌勒佛喚云菴主主應諾師云這漢還徹
也未主無語師云黃連和根煮也未是苦後
國泰代合掌云善哉善哉師云和尚與他隣

即七

八

舍住菴即得

嘗與僧擁爐僧問曰目前無法意在目前不
是目前法非耳目所到那句是主那句是賓
師指火曰與我向此中拈出一莖眉毛得麼
僧曰非但學人盡大地人喪身失命師曰汝
因甚麼自把髻投衙耶

師在婺州智者寺居第一座尋常不受淨水
主事喚曰上座不識觸淨爲甚麼不受淨水
師跳下牀提起淨瓶曰這箇是觸是淨事無
語師乃撲破

羅漢院桂琛禪師

師因插田次見僧問甚處來曰南州師曰彼
中佛法如何曰商量浩浩地師曰爭如我這
裏栽田博飯喫曰爭奈三界何師曰喚甚麼
作三界

問如何是羅漢一句師曰我向汝道却成兩句

問一佛出世普爲羣生和尚今日爲箇甚麼師曰甚麼處遇一佛曰恁麼即學人罪過師曰謹退

說月次乃曰雲動有兩去有僧曰不是雲動是風動師曰我道雲亦不動風亦不動曰和尚適來又道雲動師曰阿誰罪過

問僧甚處來曰秦州師曰將得甚麼物來曰不將得物來師曰汝爲甚麼對衆謾語其僧無對師却問秦州豈不是出鸚鵡曰鸚鵡出在隴西師曰也不較多

王太傅上雪峰施衆僧衣時從弁上座不在師弟代上名受衣弁歸弟曰某甲爲師兄上名了弁曰汝道我名甚麼弟無對師代云師

兄得恁麼貪又曰甚麼處是貪處又代云兩度上名

師與長慶保福入州見牡丹障子保福曰好一朵牡丹花長慶曰莫眼花師曰可惜許一朵花

師因疾僧問和尚尊候較否師以杖拄地曰汝道這箇還痛否曰和尚問阿誰師曰問汝曰還痛否師曰元來共我作道理

太傅王延彬居士

公一日入招慶佛殿指鉢孟問殿主這箇是

即七

十

甚麼鉢主曰藥師鉢公曰祇聞有降龍鉢主曰待有龍即降公曰忽遇拏雲釀浪來時作麼生主曰他亦不顧公曰話墮也

公到招慶煎茶朗上座與明招把鉢忽翻茶鉢公問茶鑪下是甚麼朗曰捧鑪神公曰既

是捧鑪神爲甚麼翻却茶朗曰事官干日失
在一朝公拂袖便出明招曰朗上座喫却招
慶飯了却向外邊打野裡朗曰上座作麼生
招曰非人得其便

漳州報恩道熙禪師

師因與保福送書到泉州王太尉尉問漳南
和尚近日還爲人也無師曰若道爲人即屈
著和尚若道不爲人又屈著太尉來問太尉
曰道取一句待鐵牛能齧草木馬解含烟師
曰某甲惜口喫飯尉良久又問驢來馬來師
曰驢馬不同途尉曰爭得到這裏師曰謝太
尉領話

鼓山智嶽禪師

師遊方至鄂州黃龍問久嚮黃龍及乎到來
祇見赤斑蛇龍曰汝祇見赤斑蛇不見黃龍

即七

士

師曰如何是黃龍龍曰滔滔地師曰忽遇金
翅鳥來又作麼生龍曰性命難存師曰恁麼
則被他吞却去也龍曰謝闍黎供養師便禮
拜

報國照禪師

佛塔被雷霹有問祖佛塔廟爲甚麼却被雷
霹師曰通天作用曰既是通天作用爲甚麼
却霹佛師曰作用處何處見有佛曰爭奈狼
藉何師曰見甚麼

同安志禪師

先同安將示寂上堂曰多子塔前宗子秀五
老峰前事若何如是三舉莫有對者師出曰
夜明簾外排班立萬里歌謠道太平安曰須
是這驢漢始得

襄州廣德義禪師

師謁先廣德作禮問曰如何是和尚密密處
 德曰隱身不必須巖谷闌闌堆堆觀者稀師
 曰恁麼則酌水獻花去也德曰忽然雲霧靄
 闌黎作麼生師曰採汲不虛施廣德忻然曰
 大衆看取第二代廣德

襄州廣德周禪師

僧問教中道阿逸多不斷煩惱不修禪定佛
 記此人成佛無疑此理如何師曰鹽又盡炭
 又無曰鹽盡炭無時如何師曰愁人莫向愁
 人說說向愁人愁殺人

石門慧徹禪師

僧問雲光作牛意旨如何師曰陋巷不騎金
 色馬回途却著破爛衫雲光法師不事戒律
誌公曰出家何為光
曰吾不齋而齋食而非食後招報作牛拽車
於途誌公見之呼曰雲光牛舉首誌曰何不
道拽而非拽牛
墮淚跳號而卒

香林澄遠禪師

僧問美味醍醐為甚麼變成毒藥師曰導江
 紙貴

問如何是西來的的意師曰坐久成勞

僧問北斗裏藏身意旨如何曰月似彎弓少

雨多風問如何是室內一燈曰三人證龜成

鼈問如何是衲衣下事曰臘月火燒山問魚

游陸地時如何曰發言必有後救僧云却下

碧潭時如何曰頭重尾輕

問一子出家九族盡得解脫目連為甚麼母

入地獄師曰確第七

將示寂辭知府宋公璫曰老僧行脚去通判

曰這僧風狂八十歲行脚去那裏宋曰大善

知識去住自由歸謂衆曰老僧四十年方打

成一片言訖而逝

新開院顯鑒禪師

師問僧遊山來爲佛法來曰清平世界說甚麼佛法師曰好箇無事禪客曰早是多事了也師曰上座去年在此過夏了曰不曾師曰與麼則先來不相識下去

聖

三

問祖意教意是同是別師曰雞寒上樹鴨寒下水

洞山守初宗慧禪師

師曰言無展事語不投機乘言者喪滯句者迷於此四句語中見得分明也作箇脫灑衲僧根椽片瓦粥飯因緣堪與人天爲善知識於此不明終成莽鹵

問僧甚處來曰汝州師曰此去多少曰七百里師曰踏破幾緉草鞋曰三緉師曰甚處得錢買曰打笠子師曰叅堂去僧應諾

問僧莫便是新到否曰是師曰夜來投棲處今朝事如何曰今朝風較急青山背上行師曰不是更道曰珍重師便打問不向心頭安了義如何得達祖師言師曰六脚蜘蛛上板牀

金陵奉先深禪師

師同明和尚在衆時聞僧問法眼如何是色眼豎起拂子或曰雞冠花或曰貼肉汗衫二人特往請益問曰承聞和尚有三種色語是否眼曰是師曰鷄子過新羅便歸衆時李主在座下不肯乃白法眼曰寡人來日致茶筵請二人重新問話明日茶罷備綵一箱劍一口謂二師曰上座若問話得是奉賞雜綵一箱若問不是祇賜一劍法眼陞座師復出問今日奉勅問話師還許也無眼曰許曰鷄子

過新羅捧綵便行大衆一時散去時法燈作
維那乃鳴鐘集衆僧堂前勸師衆集燈問承
聞二上座久在雲門有甚奇特因緣舉一兩
則來商量看師曰古人道白鷺下田千點雪
黃鸝上樹一枝花維那作麼生商量燈擬議
師打一坐具便歸衆

師同明和尚到淮河見人牽網有魚從網透
出師曰明兄俊哉一似箇衲僧相似明曰雖
然如此爭如當初不撞入網羅好師曰明兄
你欠悟在明至中夜方省

大容謹禪師

僧問既是大容爲甚麼趣出僧師曰大海不
容塵小谿多搯擗

問如何是古佛一路師指地僧曰不問這箇
師曰去

即七

十四

師與一老宿相期他往偶因事不去宿曰佛
無二言師曰法無一向

華嚴慧禪師

僧問承古有言妄心無處即菩提正當妄時
還有菩提也無師曰來音已照曰不會師曰
妄心無處即菩提

西禪欽禪師

僧問如何是函蓋乾坤句師曰天上有星皆
拱北曰如何是截斷衆流句師曰大地坦然
平曰如何是隨波逐浪句師曰春生夏長

即七

十五

洞山清稟禪師

師叅雲門門問今日離甚處曰慧林門舉柱
杖曰慧林大師恁麼去汝見麼師曰深領此
問門顧左右微笑而已

白雲智作禪師

僧問如何是枯木裏龍吟師曰火裏蓮生曰
如何是鬪牒裏眼睛師曰泥牛入海

北禪寂禪師

師問僧甚處來曰黃州師曰夏在甚處曰資
福師曰福將何資曰兩重公案師曰爭奈在
北禪手裏曰在手裏即收取師便打僧不甘
師隨後趁出

首山省念禪師

師與真園頭同上問訊風穴次穴問真曰作
麼生是世尊不說說真曰鶉鳩樹頭鳴穴曰
汝作許多癡福作麼何不體究言句又問師
曰汝作麼生師曰動容揚古路不墮悄然機
穴謂真曰汝何不看念法華下語

問僧不從人薦得底事試道看僧便喝師曰
好好相借問惡發作麼僧又喝師曰今日放

過即不可僧擬議師喝之

問有一人蕩盡來時師還接否師曰蕩盡即
置那一人是誰曰風高月冷師曰僧堂內幾
人坐臥僧無對師曰賺殺老僧

問如何是梵音相師曰驢鳴犬吠乃曰要得
親切第一莫將問來問還會麼問在答處答
在問處汝若將問來問老僧在汝脚底汝若
擬議即沒交涉時有僧出禮拜師便打僧便
問挂錫幽巖時如何師曰錯僧曰錯師又打
師問僧近離甚處僧曰襄州師云路上曾逢
達摩也無僧近前云不審師云這箇是驢前
馬後底僧云和尚又如何師曰非公境界且
坐喫茶僧纔坐師又問在甚麼處過夏僧云
石門師云水牯牛安樂麼僧云及時水草師
曰爲甚麼傷人苗稼僧云對和尚不敢造次

師云放過即不可便打

黑水和尚

師叅黃龍問雪覆蘆花時如何龍曰猛烈師曰不猛烈龍又曰猛烈師又曰不猛烈龍便打於此有省便禮拜

秦樹和尚

十六

師問僧近離甚處曰漢國師曰漢國天子還重佛法也無曰苦哉賴值問著某甲問著別人則禍生師曰作甚麼曰人尚不見有何佛法可重師曰闍黎受戒來多少時曰二十夏師曰大好不見有人便打

清涼休復禪師

僧問古人得箇甚麼即便休歇去師曰汝得箇甚麼即不休歇去

龍濟紹修禪師

即七

十七

示眾具足凡夫法凡夫不知具足聖人法聖人不會聖人若會即是凡夫凡夫若知即是聖人此語具一理二義若人辨得不妨於佛法中有箇入處若辨不得莫道不疑好又云是性不見性非性不見性是是非已去了是非裏薦取

問如何得出三界師曰是三界則一任出曰不是三界又如何師曰甚麼處不是三界問僧甚處來曰翠巖師曰翠巖有何言句示徒曰尋常道出門逢彌勒入門見釋迦師曰與麼道又爭得曰和尚又如何師曰出門逢阿誰入門見甚麼僧於言下有省上堂聲色不到處病在見聞言詮不及處過在唇吻僧問離却聲色請和尚道師曰聲色裏問將來

廣平玄旨禪師

僧問如何是廣平境師曰地負名山秀谿連
海水清曰如何是境中人師曰汝問我答
問如何是法身體師曰廓落虛空絕點瑕曰
如何是體中物師曰一輪明月散秋江曰未
審體與物分不分師曰適來道甚麼曰恁麼
則不分也師曰穿耳胡僧笑點頭

靈峰志恩禪師

僧問如何是靈峰境師曰萬疊青山如釘出
兩條綠水若圖成曰如何是境中人師曰明
明密密密密明明

鼎州梁山緣觀禪師

師會下有箇園頭叅得禪衆中多有不信者
一日有僧去撩撥他要其露箇消息乃問園
頭何不出問堂頭一兩則話結緣園頭云我

即七

大

除是不出問若出須教這老漢下禪牀立地
在及梁山上堂果出問曰家賊難防時如何
山曰識得不爲寃曰識得後如何山云貶向
無生國裏曰莫是他安身立命處也無山云
死水不藏龍曰如何是活水裏龍山云興波
不作浪曰忽然傾湫倒嶽時如何梁山果然
從法座上走下把住云闍黎莫教濕著老僧
袈裟角

智門光祚禪師

上堂一法若有毘盧墮在凡夫萬法若無普
賢失其境界正當恁麼時文殊向甚麼處出
頭若也出頭不得金毛師子腰折幸好一盤
飯莫待糝薑椒
上堂山僧記得在母胎中有一則語今日舉
似大眾諸人不得作道理商量還有人商量

得麼若商量不得三十年後不得錯舉

開福賢禪師

僧問如何是初僧活計師曰耳裏種田

上堂不用思而知不用慮而解知解俱泯合

談何事師曰一葉落天下秋

乾明睦禪師

師問洞山停機罷賞時如何洞山曰水底弄

傀儡師曰誰是看翫者洞山曰停機罷賞者

師曰恁麼則知音不和也洞山曰知音底事

作麼生師曰大盡三十日洞山曰未在更道

師曰某甲合喫和尚手中痛棒洞山休去

西峰雲谿禪師

師早扣諸方晚見清涼問佛未出世時如何

清涼曰雲遮海門樹曰出世後如何清涼曰

擘破鐵圍山師於言下大悟清涼印可之

大歷和尚

僧問施主供養將何報答師以手捋髭曰有
髭即捋無髭又如何師曰非公境界

連州寶華和尚

師問僧甚處來曰大容來師曰大容近日作
麼生曰近來合得一囊醬師喚沙彌將一碗
水來與這僧照影

月華山月禪師

有一老宿上法堂東西顧視曰好箇法堂要
且無主師聞乃召曰且坐喫茶宿問曰玄中
最的猶是龜毛兔角不向二諦中修如何密
用師曰側宿曰恁麼則拗折拄杖割斷草鞋
去也師曰細而詳之

蘄州五祖師戒禪師

湖州上方嶽禪師至丈室師曰上人名甚麼

對曰齊嶽師曰何似泰山嶽無語師即打趕
翌日復謁師曰汝作甚麼嶽回首以手畫圓
相呈之師曰是甚麼嶽曰老老大大胡餅也
不識師曰趁鑪竈熱更裕一箇嶽擬議師拽
拄杖趕出門及數日後嶽再詣乃提起坐具
曰展則大千沙界不展則毫髮不存爲復展
即是不展即是師遽下繩牀把住云既是熟
人何須如此嶽又無語師又打出

福昌善禪師

僧問如何是正法眼師曰夜觀乾象曰學人
不會意旨如何師曰日裏看山

法眼文益禪師

僧問聲色兩字甚麼人透得師却謂衆曰諸
上座且道這僧還透得也未若會此僧問處
透聲色也不難

師問修山主毫釐有差天地懸隔兄作麼生
會修曰毫釐有差天地懸隔師曰恁麼會又
爭得修曰和尚如何師曰毫釐有差天地懸
隔修便禮拜

因僧來參次師以手指簾尋有二僧齊去捲
簾師云一得一失

問覺上座船來陸來曰船來師曰船在甚麼
處曰在河裏覺退師問旁僧曰你道適來這
僧具眼不具眼

師令僧取土添蓮盆僧取土到師曰橋東取

橋西取曰橋東取師曰是真實是虛妄

問僧甚處來曰泗州禮拜大聖來師曰今年
大聖出塔否曰出師却問旁僧曰汝道伊到
泗州不到

雲門問僧甚處來曰江西來門曰江西一隊

老宿寐語住也未僧無對後僧問師不知雲
門意作麼生師曰大小雲門被這僧勘破
生法師曰敲空作響擊木無聲師忽聞齋魚
聲謂侍者曰還聞麼適來若聞如今不聞如
今若聞適來不聞會麼

師見僧搬土次乃以一塊土放僧擔上曰吾
助汝僧曰謝和尚慈悲師不肯一僧別云和
尚是甚麼心行師便休去

問六處不知音時如何師曰汝家眷屬一羣
子師又曰作麼生會其道恁麼來問便是不
得汝道六處不知音眼處不知音耳處不知
音若也根本是有爭解無得古人道離聲色
著聲色離名字著名字所以無想天修得經
八萬大劫一朝退墮諸事儼然蓋爲不知根
本真實次地修行三生六十劫四生一百劫

如是直到三祇果滿他古人猶道不如一念
緣起無生超彼三乘權學等見又道彈指圓
成八萬門刹那滅却三祇劫也須體究若如
此用多少氣力

汾陽善昭禪師

僧問如何是接初機底句師曰汝是行脚僧
又問如何是辨衲僧底句師曰西方日出卯
又問如何是正令行底句師曰千里特來呈
舊面又問如何是立乾坤底句師曰北俱盧
洲長粳米食者無嗔亦無喜又曰只將此四
轉語驗天下衲僧纔見汝出來驗得了也

即七

三

問大悲千手眼如何是正眼師曰瞎曰恁麼
則一條拄杖兩人舁師曰三家村裏唱巴歌
曰恁麼則和尚同在裏頭師曰謝汝慇懃
鄭工部到茶話次鄭呈師偈曰黃紙休遮眼

青雲自有陰莫將閒學解埋沒祖師心復云
又將此偈驗天下長老師曰與麼則汾陽也
在裏頭云擔枷過狀師云更不再勘鄭云兩
重公案師云知即得鄭良久師噓一聲鄭云
文寶文寶師云在甚所在鄭云不容某甲出
氣爭得嗔他道淹滯長老在此師曰是何言
歟鄭云實師云也不得放過鄭云請師一偈
師云不閒紙墨隨示偈云荒草尋幽徑巖松
迥布陰幾多立學客失却本來心
上堂謂衆曰夫說法者須具十智同真作麼
生是十智同真與諸上座點出一同一質二
同大事三總同叅四同真智五同徧普六同
具足七同得失八同生殺九同音吼十同得
入又曰與甚麼人同得入與阿誰同音吼作
麼生是同生殺甚麼物同得失阿那箇同具

即七

三五

足是甚麼同徧普何人同真智孰能總同叅
那箇同大事何物同一質有點得出底麼點
得出者莫吝慈悲點不出來未有叅方眼在
切須辨取要識是非面目見在不可久立珍
重

承天三交智嵩禪師

師辭首山山以柱杖送師師接得有偈曰和
尚柱杖照破龍象臨濟家風落在我掌山云
莫相帶累師打山一坐具山曰果然帶累師
云今日捉敗這老漢山云又似得便宜又似
落便宜

楊侍郎李駙馬與師問答問彌陀演化於西
方達摩傳心於東土胡來漢現水到渠成五
嶽鎮靜以崢嶸百谷朝宗而浩渺一靈之性
託境現形三有之中憑何立命師云仙人無

婦玉女無夫楊云尼剃頭不復生子師云陝府鐵牛能哮吼嘉州大像念摩訶李云側跳上山巔師云騎牛不著靴

問玄沙不出嶺保壽不渡河善財叅知識五十三員惠遠結黑白一十八士雪峰三度上投子智者九旬講法華遮六箇漢爲復野干鳴爲復獅子吼速道速道師云水急魚行澀峰高鳥不棲楊云泗州大聖師云土上加泥更一重李云舌上覆金錢師曰半夜歌樂動誰是得知音

師作宗本頌左顧右覩黃昏莽鹵展手回來早是彰露且道作麼生是彰露底句楊云正殺人時努出頭師云兩脚捎空手又胸李云左鬚右髮隱文章師云名利已彰天下去丫頭女子倒騎牛師復云維摩一默文殊贊善

即七

三五

若遇老僧在彼各與三十棒且道這二老漢過在什麼處楊云頭破作七分如阿黎樹枝師云迦葉不擎拳阿難不合拿李云似犢牛兒未用角時師云忙屈拳打令師復云教有明文佛身充滿於法界老僧今日充滿於法界侍郎即今在甚麼處楊云布裙一截泥努出膝蓋子師云寬口布袴三尺杖李云河水一擔值三文師云只見鼻頭津不見頂後濕

廣教歸省禪師

師叅首山山一日舉竹篋問曰喚作竹篋即觸不喚作竹篋則背喚作甚麼師掣得擲地上曰是甚麼山曰瞎師於言下豁然頓悟問維摩丈室不以日月爲明和尚丈室以何爲明師曰眉分八字曰未審意旨如何師曰雙耳垂肩

問如何是和尚深深處師曰猫有歎血之功
虎有起尸之德曰莫便是也無師曰碓搗東
南磨推西北

問忽遇大闡提人來還相爲也無師曰法久
成弊曰慈悲何在師曰年老成魔

即七

三五

問已事未明以何爲驗師曰鬧市裏打靜槌
曰意旨如何師曰日午點金燈

僧問聞鐘聲只有這箇聲爲復別有師曰腦
後三斤

問一僧曰近離什麼處僧曰東京師曰你因
甚口上破僧曰和尚也須仔細師曰七棒對
十三庫下喫茶去

師到洞山問洞山廓然無依法歸何處山云
三番羯磨師云恁麼即知音不和也山云知
音不和底事作麼生師云龜毛拂子長三尺

山云你因什麼眉鬚墮落師便禮拜

神鼎洪謹禪師

有僧自汾州來師倚柱杖曰一朵峰巒上獨
樹不成林時如何僧曰水分江樹淺遠澗碧
泉深又問作麼生是回互之機僧曰盲人無
眼又問曰我在衆時不會汾陽一偈上座久
在法席必然明了僧曰請和尚舉看師曰鵝
王飛鳥去馬頭嶺上住天高蓋不得大家總
上路作麼僧舉起坐具曰萬年松在祝融峰
師曰不要上座答話試說看僧曰忽憶少年
曾覽照十分光彩臉邊紅即拂衣去師曰弄
巧成拙

師住神鼎以一朽牀爲說法座其甘枯淡無
比德臘俱高諸方尊之如古趙州

谷隱蘊聰慈照禪師

師到太陽玄和尚問近離甚處師曰襄州陽
曰作麼生是不隔底句師曰和尚住持不易
陽曰且坐喫茶師便叅衆去侍者問適來新
到祇對住持不易和尚爲甚麼教坐喫茶陽
曰我獻他新羅附子他酬我舶上茴香你去

即七

去

問他有語在侍者請師喫茶問適來祇對和
尚道住持不易意旨如何師曰真鍮不博金
僧侍立次師問甚麼處坐曰後架裏坐師曰
你向甚麼處舉話曰與主人公舉話師曰主
人公姓甚麼曰不得姓師曰名甚麼曰不得
名師曰恁麼則不識主人公也僧便喝師不
對
問古人索火意旨如何師曰任他滅曰滅後
如何師曰初三十一
問寸絲不挂法網無邊爲甚麼却有迷悟師

曰兩桶一擔

上堂十五日已前諸佛生十五日已後諸佛
滅十五日已前諸佛生你不得離我這裏若
離我這裏我有鈎子鈎你十五日已後諸佛
滅你不得住我這裏若住我這裏我有錐子
錐你且道正當十五日用鈎即是用錐即是
遂有偈曰正當十五日鈎錐一時息更擬問
如何回頭日又出

廣慧元璉禪師

即七

三七

師初依招慶真覺禪師日事炊爨有問誦經
真覺見而問曰汝念甚麼經對曰維摩經真
覺曰經在這裏維摩在甚麼處師茫然無以
酬泣涕曰大丈夫漢被人一問無詞可措豈
不媿哉於是謁閩中尊宿歷五十餘員不能
契旨遂趨河南首山山問近離甚處師曰漢

上山豎起拳曰漢上還有這箇麼師曰這箇是甚麼盃鳴聲山曰瞎師曰恰是拍一拍便出他日又問學人親到寶山空手回時如何山曰家家門前火把子師當下大悟云某甲不疑天下老和尚舌頭也山曰汝會處作麼生與我說來看師曰祇是地上水碓砂也山曰汝會也師便禮拜

許郎中式潛西蜀經由謁師適接見於佛前許曰先拜佛先拜長老師曰蝦蟆吞大蟲許曰恁麼則總不拜去也師曰運使話墮許曰許長老具一隻眼師以衣袖便拂許曰今日看破便禮拜

住後楊億侍郎問天上無彌勒地下無彌勒未審在甚麼處師曰敲磚打瓦又問風穴道金沙灘頭馬郎婦意旨如何師曰更道也不

及

鹿門慧昭山主

楊億侍郎問曰入山不畏虎當路却防人時如何師曰君子坦蕩蕩

智門罕迴禪師

師爲北塔僧使點茶次師起揖曰僧使近上坐使曰鷄子頭上爭敢安巢師曰棒上不成龍隨後打一坐具使茶罷起曰適來却成觸忤和尚師曰江南杜禪客覓甚麼第二盃

太陽警玄禪師

即七

天

師遊方初到梁山問如何是無相道場梁山指觀音曰這箇是吳處士畫師擬進語梁山急索曰這箇是有相底那箇是無相底師遂有省便禮拜梁山曰何不道取一句師曰道即不辭恐上紙筆梁山笑曰此語上碑去在

石霜誠禪師

僧問古者道捲簾當白晝移榻對青山如何
 是捲簾當白晝師曰過淨瓶來曰如何是移
 榻對青山師曰却安舊處著
 上堂云心外無法法外無心隨緣蕩蕩更莫
 沉吟你等諸人纔上階道便好回去更要待
 第二杓惡水潑作甚麼

泐潭澄禪師

師一日見僧披衲師曰得恁麼好針線曰祇
 要牢固師曰打草驚蛇作甚麼曰客來須看
 師曰祇有這箇更別有曰雲生嶺上師曰未
 在更道曰水滴巖前

御選語錄卷第三十七

即七

于九

音釋

確克角切音堅也 條他乃切音綽編絲繩也 駮展去聲
 幪猶孟切音張畫繪也 披通肩切音碑阪也 夔與攪同 納與良
 擗切音雨 搯上克切音登搯搯搯也 夔與攪同 納與良
 雙履也切音獨 擗切音雨 搯上克切音登搯搯搯也 夔與攪同 納與良
 牛子也切音獨 擗切音雨 搯上克切音登搯搯搯也 夔與攪同 納與良